

Script of Evening Gojri News Bulletin 13 November 2024 at 1700 Hrs

ایوننگ گو جری نیوز بلیٹن مورخہ 13 نومبر 2024

یوہ آکا شوانی جموں بے محبوب سلطانی تے نصرت چودھری تیں خبر سنو۔ پہلاں خاص خاص خبر۔

- *1- صدر جمہوریہ درویدی مرمو نے کہیو ہے جے سیاحت غی ترقی تیں نہ صرف مہارا ورثہ نانہہ فروغ ملے بلکہ نوجوانان واسطے روزگار غا نواں مواقع وی پیدا ویں گا۔
- *2- وزیر اعظم نریندر مو دی نے ملک پھر مانہہ ریلوے سٹیشنان ور 18 پردہان منتری بھارتیہ جن آشودھی کیندران گو افتتاح کیو۔
- *3- مبینہ طور ور 119 دبشت گرد جموں کشمیر مانہہ سرگرم ہیں۔ جن مانہہ غیر ملکی دبشت گردان غا مقابلہ مانہہ مقامی کہت ہیں۔
- *4- بی ایس ایف غا ایڈیشنل ڈائریکٹر جنرل ستیش کے کھاندرے نے جموں مانہہ پاکستان غے نال بین القوامی سرحد ور سکیورٹی غی صورتحال غو جائزو لیو۔

خبران غی تفصیل نال پہلاں محبوب سلطانی۔

Gujrat President

صدر جمہوریہ درویدی مرمو نے کہیو ہے جے سیاحت غی ترقی نہ صرف مہارا ورثہ نانہہ فروغ دے رہی ہے بلکہ نوجوانان واسطے روزگار غا وسیع موقع وی پیدا کر رہی ہے۔ صدر جمہوریہ جہیڑی مرکزی زیر انتظام علاقان دادر تے نگر حویلی اور دمن تے دیو غا 3 روزہ دورہ ور ہیں نے اج یوٹی مانہہ بکھ بکھ ترقیاتی پروجیکٹان غو افتتاح کیو جن مانہہ زانڈا سپورٹس ارینا چوک سکول تے دیگر شامل ہیں۔ اک اجتماع سنگ خطاب کرتاں وان محترمہ مرمو نے سیاحت، تعلیم تے خطہ غی صنعتی ترقی مانہہ یوٹی انتظامیہ غی سراہنا وی کی۔ انہان نے گرائیاں غی ترقی بارے وی زور پایو تانجے ترقی یافتہ بھارت غا ہدف نانہہ حاصل کیو جا سکے۔ انہان نے قبائلی برادری غی فلاح و بہبود واسطے سرکار غا عزم نانہہ وی دہرایو۔ اس تیں پہلاں صدر جمہوریہ نے سلواسہ مانہہ نمو طبی تعلیمی تے تحقیقی اداران غو دورو وی کیو۔ بعد مانہہ وے دیو گھکروی میموریل غو دورو کریں گی۔ مہارا نمائندہ نے خبر توری ہے جے زانڈا سکولی تعلیم 76 کروڑ روپیاں غی لاگت سنگ تیار کیو گیو ہے جہیڑو تقریباً 12 ہزار طلباء واسطے جدید سہولیات سنگ لیس ہے۔

PM Jan Aushadi

وزیر اعظم نریندر مو دی نے اج 18 پردہان منتری بھارتیہ جن آشودھی کیندر ملک غا بکھ بکھ ریلوے سٹیشنان توں قوم غے ناں وقف کیا ہیں۔ جناب مو دی نے ان آشودھی کیندر غو افتتاح پہا ر غا دھربنگا توں ویڈیو کا نفرنسنگ غے ذریعے کیو۔ اس غے نال نال انہان نے 12 ہزار کروڑ روپیاں غی لاگت آلا کئی ترقیاتی پروجیکٹان نانہہ وی شروع کیو۔ ان کیندر سنگ مسافران نانہہ ریلوے سٹیشنان ور مناسب قیمت مانہہ دوائی مہیا کرانی جانیں گے۔ دھربنگا غی شو بہان مانہہ عوامی اجتماع سنگ خطاب کرتاں وان جناب مو دی نے کہیو ہے ان غی سرکار غی اصل توجہ ملک مانہہ جامع صحت خدمات غے نال نال صحت غا 8 پہلوں ور ہے جن مانہہ بیماری غی روک تھام، سستہ علاج غی

فراہمی، ٹیکنالوجی غو استعمال اور بہترین طبی سہولیات غی فراہمی شامل ہے۔ وزیر اعظم نے کہیو جے آگلا 5 بہراں مانہہ 75 ہزار نوی طبی سیٹاں نانہہ وی شامل کیو جا نے گو۔ ان گو مزید کہنو تھو جے اقتصادی طور ور کمزور طبقات واسطے 1 لکھ 50 ہزار توں متا آیوش مان آروگیہ مندر وی پورا ملک مانہہ کھولیا گیا ہیں۔ جناب مو دی نے کہیو جے بہترین زندگی جین واسطے ہم نے صحت خدمات مانہہ یوگا، آیوش تے دوجی طاقتی غذا نانہہ شامل کیو ہے۔ جناب مو دی نے کہیو جے این ڈی اے سرکار نے صحت دیکھ بہال نظریہ مانہہ خاصی تبدیلی آئی ہیں۔ انہاں نے کہیو جے آیوشمان بھارت تے پی ایم جن آشودھی سکیم تے صحت غا نظام مانہہ تبدیلی آئی ہے۔ وزیر اعظم نے کہیو جے آیوشمان بھارت غی سکیم توں 4 کروڑ غریباں نانہہ فاندو پجیو ہے اور تقریباً 1 عشاریہ 25 لکھ کروڑ روپیا وی غریب لوکاں غا بچایا ہیں۔ انہاں نے نامور لوک گلوکار شاردھا سنہا نانہہ وی خراج عقیدت پیش کیو اس دوران بہار غا گورنر تے وزیر اعلیٰ وی موجود تھا۔

Jhiri Mela

دس تہاڑاں ور مشتمل جھڑی میلو پلک توں شروع ہون جا رہیو ہے۔ یوہ میلو جموں توں 20 کلو میٹر دور جموں اکھنور شاہراہ ور واقعہ جھڑی گراں مانہہ منایو جا نے۔ مہارا آکاشوانی جموں غا نامہ نگار نے خبر ٹوری ہے جے یوہ میلو جھڑی گراں مانہہ ہر سال اکتوبر یاہ نومبر مہینہ مانہہ کا رتک پرنیما غا موقعہ ور منایو جا نے۔ یوہ میلو بابا جیتو جھیرا جے اک کسان تھا غی عاجزی، ایمانداری، ثقافت، سچائی غی اک علامت ہے۔ اس میلہ مانہہ لکھاں غی تعداد مانہہ لوک پورا ملک تے بیرون ملکاں توں شامل ہیں۔ اس دوران عقیدت مند جھڑی گراں غو دورو کر غے 16 ویں صدی غا ڈوگرہ جاتباز تے انقلابی کسان بابا جیتو نانہہ خراج عقیدت پیش کریں۔ اس میلہ مانہہ تقریباً 20 لکھ سیلانیں راغب ہیں۔ یوہ میلو سرکاری محکمان واسطے گرانیاں مانہہ رہن آلی آبادی بارے سکیمان تے پروگرام گا بابدہ واسطے وی فاندہ مند ہے۔ اس ضمن مانہہ بکھ بکھ سرکاری محکمہ کساناں غی فلاح و بہبود واسطے سکیمان بارے آگاہی دین بارے خصوصی اسٹالز وی لارہیا ہیں۔ اس میلہ غے ذریعے مقامی کاریگراں نانہہ وی فروغ دتو جا نے گو۔ اس دوران جدید ذراعت، بیج، کھاد گا بارا مانہہ وی جانکاری دتی جا نے گی۔ انتظامیہ نے بنیادی ڈھانچہ غی بہتری، سڑکاں غی مرمت، صحت خدمات، پانی تے بجلی غی فراہمی سمیت تمام انتظامات پورا کر لیا ہیں۔ یوہ میلو باواجیتو غی عظیم قربانی غی یاد مانہہ منایو جا نے۔ جھیرا ماتا ویشنو دیوی نانہہ منن آلا تھا اور نا انصافی غے خلاف لڑتاں واں اپنی جان قربان کر دتی تھی۔

Bawa Jitoo Show

جھڑی غا مقام ور 14 تے 15 نومبر نانہہ میلہ 2024 غے دوران ڈوگرہ لوک جاتباز باوا جیتو غی عظیم شہادت ور تھیٹر گروپ نٹرنگ غی طرفوں تھیٹر شو منعقد کیو جائے گو۔ اس شو غو ویلو دوئے تہاڑے شام غا 7 بجے غو رکھیو گیو۔ اک پریس کانفرنس سنگ خطاب کرتاں واں نٹرنگ غا سینئر فنکار ارویند انند تے سبھاش جمواں تیں علاوہ نٹرنگ گا ڈائریکٹر تے اس شو نانہہ بنان آلا پدم شری اعزاز یافتہ بلونت ٹھاکر نے کہیو ہے جے باوا جیتو بھارت غا سب توں لمبا عرصہ تک جاری رہن آلو تھیٹر ڈرامو ہے جھیرا پچھلا 39 بہراں توں سٹیج ور کیو جا رہیو ہے۔ انہاں نے دسیو ہے جے باوا غو کردار ارویند انند کر رہیا ہیں جد کہ انیل ٹیکو مالی غو کردار ادا کر رہیا ہیں۔

Accident Reasi

ویشنو دیوی غا 15 عقیدت مند اج شیو کھوڑی در سفر کرتاں واں 2 گڈیاں غی ٹکر مانہہ زخمی ہو گیا ہیں۔ مہارا ضلع غا نمائندہ دویندر ٹھاکر نے خبر ٹوری ہے جے جموں کشمیر غا ریا سی ضلع مانہہ ماتا ویشنو دیوی غا درشن کرن توں بعد اک بس مانہہ شیو کھوڑی در جا رہی تھی۔ جھپڑی سمبل چواہ گا مقام ور حادثہ غی شکار ہو گئی۔ جس غا نتیجہ مانہہ 15 عقیدت مند زخمی ہو گیا۔ جن ناہہ علاج و معالجہ خاطر ریا سی غا نزدیکی ہسپتال مانہہ ٹوریو گیو۔ زخمی ہوا عقیدت منداں غو تعلق یوٹی غا سینا پور سنگ ہے۔

Philately Exhibition

ڈاک ٹکٹاں ور مبنی 2 روزہ نمائش جس مانہہ جموں غا ثقافتی ورثہ ناہہ ظاہر کیو گیو غو اج جموں غا کلا کیندر مانہہ آغاز ہو۔ جس غو افتتاح ثقافت تے اسکولی تعلیم گا پرنسپل سیکریٹری سریش کمار گپتا نے کیو۔ اس تقریب تیں جموں ضلع پھر غا مختلف اسکولاں غا طلباء غے نال نال مختلف شعباں تے زندگی تیں تعلق رکھن آلا متعدد حاضرین ناہہ اپنی طرف متوجہ کیو۔ بھارت تے بیرون ملک تیں 5 ہزار تیں متا نایاب ڈاک ٹکٹاں غی نمائش کی جا رہی ہے۔ یاہ نمائش جموں کشمیر غا تاریخی جوہر ناہہ اُجاگر کرے جس مانہہ بھارت ڈاک خاص طور ور خطہ غا بارہ مانہہ 30 تیں زیا دہ ڈاک ٹکٹاں غی نمائش کرے۔ جناب گپتا نے اس پہل واسطے محکمہ ڈاک غی ستائش کی۔ قومی ورثہ ناہہ سمجھن تے بچاں واسطے نشو نما مانہہ مدد کرن، جس راہ کہ نوی تعلیمی پالیسی غی حوصلہ افزائی کی گئی ہے۔ جی جی ایم سائنس کالج ور اک خصوصی کووروی جاری کیو گیو۔ جس مانہہ ڈائریکٹر پوسٹل سروس پر تیک نے ڈاک ٹکٹاں تے خصوصی کوور غے ذریعے تاریخی لمحات ناہہ محفوظ کرن مانہہ بھارتیہ ڈاک غا کردار ناہہ اُجاگر کیو۔

یہ خبر تم آکاشوانی جموں تیں سن رہیا ہیں خبراں غا باقی حصہ نال نصرت چودھری۔

Active Terrorist JK

جموں کشمیر مانہہ 119 دہشت گرد سرگرم ہیں لیکن ان مانہہ دہشت گرداں غی تعداد غیر ملکی دہشت گرداں غے مقابلہ مانہہ خاصی کھٹ ہے۔ اک قومی رسالہ نے 9 خفیہ اطلاع غو حوالو دیتاں واں دسیو ہے جے پیر پنچال رینج غا شمال مانہہ 79 دہشت گرد سرگرم ہیں جن مانہہ 61 غیر ملکی اور 18 مقامی شامل ہیں جد کہ پیر پنچال غا جنوب مانہہ سرگرم دہشت گرداں غی تعداد 40 ہے جن مانہہ 34 غیر ملکی تے 6 مقامی شامل ہیں۔ منیو جا رہیو ہے جے زیا دہ تر دہشت گرد پاکستان توں تعلق رکھیں۔ اس ضمن مانہہ دسیو گیو ہے جے دہشت گرداں غی تعداد پچھلا 5 بہراں توں کھٹ ہو رہی ہے اور اس ویلے یاہ اپنی سب توں کھٹ تعداد مانہہ ہے۔ اس سال جموں کشمیر مانہہ تقریباً 25 دہشت گردانہ حملہ ہوا ہیں جن مانہہ 24 فوجی جوان بشمول افسر وی شہید ہوا ہیں۔ جد کہ 2 ہزار 23 مانہہ 25 حملہ ہوا تھا جن مانہہ 27 جوان شہید ہوا تھا۔ اس سال حفاظتی دستاں نے 61 دہشت گرداں ناہہ مار مکایو ہے۔ جن مانہہ 45 ناہہ قبضہ لکیر توں اندر جد کہ 16 ناہہ قبضہ لکیر ور ماریو گیو ہے۔ جن مانہہ 21 غو تعلق پاکستان سنگ ہے۔ اُنکاں 2023 مانہہ 60 دہشت گرداں ناہہ مار مکایو گیو تھو۔ خفیہ ایجنسی نے اس گل غی طرف اشارو کرتاں واں کہیو ہے جے دہشت گرداں غی تعداد مانہہ کمی ہونی تے مقامی دہشت گرداں ناہہ پہرتی کرن مانہہ کمی اک مثبت گل ہے۔

BSF Security Review

سرحدی حفاظتی دستاں بی ایس ایف غی مغربی کمانڈ غا اڈیشنل ڈائریکٹر جنرل ستیش ایس کھانڈرا نے اج جموں مانہہ پاکستان سنگ لگتی بین القوامی سرحد ور حفاظتی صورتحال غو جائزو لیو۔ مہارا آکاشوانی جموں غا نامہ نگار نے خبر ٹوری ہے جے بی ایس ایف غا اے ڈی جی نے جموں غا سرحدی علاقہ غو دورو کیو۔ اس دورہ غے دوران انہاں نانہہ فیلڈ کمانڈراں نے کا روانی تیاریاں با رے تفصیلی جانکاری دتی۔ بی ایس ایف غی جموں فرنٹیر غا انسپکٹر جنرل ڈی جے بورا تے دیگر سینئر افسراں نے مغربی کمانڈ غا اے ڈی جی غو استقبال کیو تے جموں سیکٹر مانہہ ان غا دورہ غے دوران موجود وی رہیا۔ جموں سیکٹر مانہہ بین القوامی سرحدی تیں علا وہ قبضہ لکیر ور تعینات سرحدی محافظ دستاں نانہہ چوکس کر دتو گیو ہے تانجے دہشت گرداں غی طرفوں دراندازی غی کوشش نانہہ ناکام بنان غے نال نال منشیات تے ہتھیاراں غی تسکری ور روک نانہہ یقینی بنايو جا سکے۔ کشمیر تے پیر پنجال غا جنوب مانہہ زیادہ تر دراندازی آلا رستہ برف پین غی وجہ توں سردیاں غا موسم مانہہ بند ہو جائیں تے اس دوران گھنی دھند غو فاندو چاہ غے جموں غا میدانی علاقہ توں داخل ہون غی کوشش کریں۔ شمالی کمانڈ غا اے ڈی جی نے بی ایس ایف صدر مقام ور اک اعلیٰ سطحی میٹنگ وی منعقد کی جس مانہہ فیلڈ کمانڈراں نے کا روانی تیاریاں غی تفصیلی جانکاری دتی۔

GOC LoC

میجر جنرل کو شکہ مکھرجی نے باضابطہ طور رور "ایس آف سپیڈز سٹریٹیجک ڈویزن غی کمان سنبھال لی ہے۔ جس نانہہ 25 انفنٹری ڈویزن وی کہیو جائے۔ جھیڑی راجوری تے پونچھ غی دوہاں سرحدی ضلعان مانہہ سرحد غی حفاظت واسطے ذمہ دار ہے۔ اس ڈویزن غو ہیڈ کوارٹر راجوری شہر مانہہ ہے۔ اس غی قیادت پہلاں میجر جنرل گورو ریشی کر رہیا تھا۔ عہدو سنبھال تیں بعد میجر جنرل مکھرجی نے تمام رینکاں ور زور پایو کہ آپریشنل عمدگی نانہہ اگے بدھاویں تے کسے وی ہنگامی صورتحال واسطے جنگی تیاری نانہہ برقرار رکھیں۔ آکاشوانی جموں غا نمائندہ نے اطلاع دتی ہے کہ قیادت غی یاہ تبدیلی سرحد ور سکیورٹی تے تیاری واسطے ڈویزن غا عزم نانہہ واضع کرے۔

اس غے نال ہی خبراں غو یوہ بلیٹن ختم ہووے۔